

Landesbibliothek Oldenburg

Digitalisierung von Drucken

Jahrbuch für das Oldenburger Münsterland

Vechta, Oldb, 1969-

Maria Rottstegge: Asphalt

urn:nbn:de:gbv:45:1-5285

Maria Rottstegge

Asphalt

Mangers mott ik dor äöwer naodenken, wenn ick mit 'n Rad dör dei Gägend suus. Aöwer glatte, blanke Asphaltstraoten kann dat 'n Vergnäugen wäsen, wenn bloß dei Autos nich so dull an di langers bruusen.

Alümlüttken sütt man dei griesen Striepen nao dei Buurskup off Häöfe tauglien. Wat fräüher mit Eiken oder Berkenbööme anherplantet was, is meist verschwunn. Sünd hüttaoges aal liek schuurt un mit Asphalt bekläwt.

Dei Oolen, dei vör hunnert Johren hier waohnden, wulln sick wunnern. Aower hüttaoges mott dat wäsen, wo doch jederein sien Auto heff. Well so 'n Ding fäuert, weit uck, dat dei Blickkutschen Geld kost. Dör Büülsand un Löcker juckelt kiener gern mit 'n Waogen.

Nee - Asphalt is 'ne wunnerbaore Saoke.

Kiek - un dor mott ick mangers denken, off dei Ern dor unner woll aotmen kann! Is woll dumm Tüüg. Sei mott sick den Asphalt man gefaalen laoten.

Nich bloß hier gifft düsse Straoten, nee, äöwerall krüüz un quer äöwer dei ganze Welt lopt dei griesen, glatten Bänner. Alltied mehr neie Straoten un breie Autobaohnens werd baut. Uck ünner Hüüser is aals in Asphalt un Beton sett.

Un doch ..., ick denk an den Kastanienboom, dei in use Dörpstraoten sogor unner Naturschutz stünd. Solang ick denken kann, stünd hei dor. Up Beller ut oolen Tieden is hei tau seihn, mit 'n höltern Bank drunner timmert. Us Vöröllern kunn sick drup verhaolen, wenn sei ut'n Kespel in't Dörp güngen. Dei Boom har Rümte naug, stramm un stäwig tau weern. Aale Johre seet hei stickenvull van wunnerbor gäle Blaumenkessens. Läöterhen dei rotbruun Kastanien, wor dei Jungens sick dei Büxentasken mit vull stoppden. Dann köm dei Dag, wo sei dei Straoten drümher bouden. Vägels, dei bitlang inne Täuger seeten un lustig drup lossüngen, söchden sick 'ne annere Stä. Gägen den neimäudsken Specktaokel wör ehr Fleiten ümsüß.



Aower uck Diere käönt sick ümmestellen. Jüst up Asphaltstraoten
trippelt sei tau gern, wat nich alltied gaut för ehr is.
Dei oole Kastanienboom aower stünd wiederhen at 'n Recke ute
Urtied up de Straoteninsel.

Bit hei eines Doges dor leeg.

Einfach so ümmefaalen.

Aower naodenken möß ick doräöwer.

Maria Rottstegge

Dei verrägte Utflug

So mies - at düsse Sommer wör
köm mi düttmaol mien Urlaub vör.
Mien Gang dör Wald un Heide
brüing kiene Urlaubsfreide!
Dei Himmel deip un grau
un Rügen pülskede almantau
dacht ick - dat is blos'n Schuur
geeft al'n neien Schülps - in Dogesduur!
Köm mi vör - van Gott verlaoten
so heff dat ale Doge gaoten!
Vuller Lengen dacht ick trügg
an dat tau Hus gelaotene Glück!
An mienen wunderborn Frönd!
Dei mi - solang ick up dei Welt
alltied warmt - dat mi nix kellt!
So gaut is hei - so richtig nett
mien Frönd ---
mien herrlick warme Bett!
